

22 APR 1999

Mahathir-tepukan

PARLIMEN : DR MAHATHIR DAPAT TEPUKAN DARIPADA ANGGOTA BN

KUALA LUMPUR, 22 April (Bernama) -- Kemunculan Datuk Seri Dr Mahathir Mohamad di Dewan Rakyat hari ini disambut gembira oleh semua anggota Parlimen Barisan Nasional.

Ketika Perdana Menteri melangkah masuk ke dewan pada 10.37 pagi tadi, kesemua 125 penyokong kerajaan kelihatan bertepuk meja sebagai tanda menyambut kehadiran beliau. Pada masa itu, sesi soal jawab sedang berlangsung.

Dr Mahathir hadir untuk membentangkan kajian separuh penggal Rancangan Malaysia Ketujuh.

Beliau baru saja kembali bertugas pada Isnin lepas setelah menjalani rawatan jangkitan paru-paru di Institut Jantung Negara.

Dr Mahathir mengambil masa 65 minit untuk membentangkan laporan kajian separuh penggal itu. Sekali sekala beliau meneguk air.

"Untuk berucap selama satu jam lima minit adalah petanda baik. Dan saya berucap dengan suara yang sama, bukan suara perlahan," kata beliau kepada pemberita yang bertanyakan tentang kesihatannya.

Katanya beliau amat gembira dapat membentangkan kajian separuh penggal itu yang dianggapnya penting kepada beliau dan kerajaan.

Dr Mahathir juga berkata beliau kadang-kadang mengalami batuk yang adakalanya teruk.

"Jika saya dapat bertahan, saya tahanlah," katanya.

-- BERNAMA

MAM SHO MAI